

**BOSNA I HERCEGOVINA**  
*Konkurencijsko vijeće*



**БОСНА И ХЕРЦЕГОВИНА**  
*Конкуренцијски савјет*

**R J E Š E N J E**

**po Prijavi namjere koncentracije privrednog subjekta Bayerische Landesbank, Njemačka i  
privrednog subjekta Hypo Alpe-Adria-Bank International AG, Austrija**

**Sarajevo**  
**26.juli 2007.godine**



Broj: 01-04-26-019-6-II/07  
Sarajevo, 26. juli 2007. godine

Na osnovu člana 25. stav (1) pod e) člana 42. tačka d) a u vezi sa čl. 12., 14., 16. i 18., te u skladu sa članom 24. stav (2) Zakona o konkurenciji («Službeni glasnik BiH», broj 48/05) i člana 193. stav (2) Zakona o upravnom postupku («Službeni glasnik BiH», broj 29/02), po Prijavi namjere koncentracije između privrednog subjekta Bayerische Landesbank, Geschäftsanschrift Brienner 18, D-80333 Minhen, Njemačka, zastupanog po Zajedničkoj advokatskoj kancelariji Bojana Tkalčić-Đulić, Olodar Prebanić i Adela Draganović, Alipašina 51, 71000 Sarajevo, i privrednog subjekta Hypo Alpe-Adria-Bank International AG, Alpen-Adria-Platz 1, 9020 Klagenfurt, Austrija zaprimljenu pod brojem: 01-04-26-019-II/07 dana 30.05.2007. godine, Konkurencijsko vijeće, na 49. (četrdesetdevetoj) sjednici održanoj dana 26. jula 2007. godine, je donijelo

### **R J E Š E N J E**

1. Ocjenjuje se dopuštenom koncentracija koja će nastati na tržištu univerzalnog bankarstava i lizinga u Bosni i Hercegovini sticanjem većinskog vlasničkog udjela od strane privrednog subjekta Bayerische Landesbank, Geschäftsanschrift Brienner 18, D-80333 Minhen, Njemačka u privrednom subjektu Hypo Alpe-Adria-Bank International AG, Alpen-Adria-Platz 1, 9020 Klagenfurt, Austrija.
2. Ovo Rješenje o koncentraciji upisuje se u Registar koncentracija.
3. Ovo Rješenje je konačno i bit će objavljeno u «Službenom glasniku BiH», službenim glasilima entiteta i Brčko Distrikta Bosne i Hercegovine.

### **O b r a z l o ž e n j e**

Privredni subjekt Bayerische Landesbank, Geschäftsanschrift Brienner 18, D-80333 Minhen, Njemačka (u daljem tekstu: Bayern LB) putem Zajedničke advokatske kancelarije Bojana Tkalčić-Đulić, Olodar Prebanić i Adela Draganović (u daljem tekstu: podnosilac Prijave), Alipašina 51, 71000 Sarajevo, je dostavio Konkurencijskom vijeću dana 30.05.2007. godine Prijavu namjere koncentracije (u daljem tekstu: Prijava), po kojoj namjerava kupiti većinu dionica privrednog subjekta Hypo Alpe-Adria-Bank International AG, Alpen-Adria-Platz 1, 9020 Klagenfurt, Austrija (u daljem tekstu: HBINT).

Privredni subjekt Bayern LB je dostavio Konkurencijskom vijeću dopunu dana 15.06.2007. godine. Kako Prijava, nakon pregledane prispjele dokumentacije nije bila uredna i kompletna, zatražena je, od strane Konkurencijskog vijeća, dopuna dana 26.06.2007. godine, nakon čega je ista dopunjena dopisom dana 02.07.2007. godine.

Konkurencijsko vijeće je podnosiocu Prijave, dana 18.07.2007. godine izdalo Potvrdu o urednoj i kompletnoj prijavi, broj: 01-04-26-019-4-II/07, u smislu člana 30. stav (3) Zakona o konkurenciji (u daljem tekstu: Zakon).

U Prijavi namjere koncentracije podnosilac Prijave navodi da će predmetnu koncentraciju prijaviti nadležnim tijelima izvan teritorije Bosne i Hercegovine i to: Evropskoj Komisiji, Hrvatskoj Narodnoj

Banci, Komisiji za zaštitu konkurencije Republike Srbije i Kancelariji za zaštitu konkurencije Crne Gore.

Prijava je proizašla kao obaveza, u smislu člana 14. stav (1) tačka a) Zakona, jer je ukupan ostvareni godišnji prihod privrednih subjekata Bayern LB i HBINT na svjetskom tržištu, iznosio preko 100.000.000,00 KM po završnom računu za 2006. godinu pri čemu privredni subjekt HBINT ima registrovana supsidijarna društva na teritoriji Bosne i Hercegovine. Prijava je podnesena u roku propisanim u skladu sa članom 16. stav (1) Zakona.

Ukupan godišnji prihod učesnika koncentracije na dan 31.12.2006. godine iznosio je:

Tablica 1.

<b>Ukupan godišnji prihod (u KM)</b>	<b>Bayern LB</b>	<b>HBINT</b>
Svijet	(..)** <sup>1</sup>	(..)**
Bosna i Hercegovina	-	(..)**

Analizirajući podatke iz Prijave, podatke koje posjeduje Konkurencijsko vijeće kao i ostalu dostavljenu dokumentaciju na osnovu koje je izvršena ocjena pozitivnih i negativnih efekata predmetne koncentracije, u smislu člana 17. Zakona, Konkurencijsko vijeće, primjenjujući odredbe Zakona, Odluke o načinu podnošenja prijave i kriterijima za ocjenu koncentracija privrednih subjekata («Službeni glasnik BiH», broj 95/06), te Odluke o utvrđivanju relevantnog tržišta («Službeni glasnik BiH», broj 18/06) je utvrdilo sljedeće činjenice:

### **1. Pravni osnov i oblik koncentracije**

Pravni osnov predmetne koncentracije predstavljaju četiri odvojena ugovora, zaključena dana 22.05.2007. godine po kojima privredni subjekt Bayern LB kupuje ukupno 50,22% dionica privrednog subjekta HBINT i to od: privrednog subjekta Kärntner Landes - und Hypothekenbank – Holding, Klagenfurt, Austria (KLHD) u visini od (..)\*\*%, privrednog subjekta Hypo Alpe – Adria Mitarbeiter Privatstiftung, Klagenfurt, Austrija (MAPS) u visini od (..)\*\*% i privrednog subjekta Berlin & Co Capital S.A.R.L., Luxemburg (Berlin & Co) u visini od (..)\*\*% .

Nakon realizacije prenosa dionica privredni subjekt Bayern LB će steći 50,22% dionica u privrednom subjektu HBINT, dok preostale dionice u privrednom subjektu HBINT bit će u vlasništvu slijedećih privrednih subjekata i to: Hypo-Bank Burgenland AG ("Bank Burgenland") u visini od 26,45%, KLHD u visini od 20% i MAPS u visini od 3,33%.

Pravni oblik predmetne koncentracije je sticanje kontrole privrednog subjekta Bayern LB nad privrednim subjektom HBINT, kupovinom većine dionica u osnovnom kapitalu privrednog subjekta u skladu sa članom 12. stav (1) pod b) Zakona.

### **2. Učesnici predmetne koncentracije**

Učesnici predmetne koncentracije su privredni subjekt Bayerische Landesbank, Geschäftsanschrift Brienner 18, D-80333 Minhen, Njemačka i privredni subjekt Hypo Alpe-Adria-Bank International AG, Alpen-Adria-Platz 1, 9020 Klagenfurt, Austrija.

<sup>1</sup> (..)\*\* - podaci predstavljaju poslovnu tajnu

## **2.1. Privredni subjekt Bayerische Landesbank, Njemačka**

Privredni subjekt Bayerische Landesbank je upisan u privredni registar u Minhenu pod registarskim brojem HRA 76030 dana 24.07.1972. godine sa registrovanim sjedištem na adresi Geschäftsanschrift Brienner broj 18, D-80333 Minhen, Njemačka. Osnovna djelatnost privrednog subjekta Bayern LB je pružanje usluga na bankarskom i finansijskom tržištu.

Privredni subjekt Bayern LB ne posluje u Bosni i Hercegovini kao samostalan privredni subjekt, nema povezanih društava u Bosni i Hercegovini, nema udjela u osnovnom kapitalu niti glasačkih prava u drugim privrednim subjektima na tržištu Bosne i Hercegovine.

## **2.2. Privredni subjekt Hypo Alpe-Adria-Bank International AG , Austrija**

Privredni subjekt Hypo Alpe-Adria-Bank International AG, Alpen-Adria-Platz 1, 9020 Klagenfurt, Austrija je banka upisana u registar okružnog suda u Klagenfurt-u pod privrednim registarskim brojem FN 108415i dana 30.08.1991. godine. Osnovna djelatnost privrednog subjekta HBINT je pružanje usluga na bankarskom i finansijskom tržištu.

Hypo grupa na tržištu Bosne i Hercegovine je prisutna od 2001. godine kada je počela poslovati preuzimanjem privrednog subjekta Auro Banke d.d. Mostar, a kasnije i privrednog subjekta Kristal banke a.d. Banja Luka čime je značajno ojačala cjelokupnu poziciju na području cijele Bosne i Hercegovine.

Privredni subjekt Hypo Alpe-Adria-Bank d.d. Mostar (HAAB d.d. Mostar) upisan je u registar Općinskog suda u Mostaru pod registarskim brojem 1-10164 za obavljanje djelatnosti banaka, primanje svih vrsta novčanih depozita i drugih novčanih sredstava, davanje i uzimanje kredita, finansijsko posredovanje i ostalo.

Privredni subjekt Hypo Alpe-Adria-Bank a.d. Banja Luka (HAAB a.d. B.Luka) upisan je u registar Osnovnog suda u Banja Luci pod registarskim brojem 3-25-00 dana 09.10.2003. godine za obavljanje svih oblika bankarskih djelatnosti.

Privredni subjekti HAAB d.d. Mostar i HAAB a.d. Banja Luka imaju razvijenu mrežu poslovnica na teritoriju cijele Bosne i Hercegovine sa 77 filijala i poslovnih jedinica koji čine poslovnu mrežu Hypo Alpe – Adria grupe na tržištu Bosne i Hercegovine. Od toga, poslovnu mrežu privrednog subjekta HAAB d.d. Mostar čini 5 filijala, te 40 poslovnica i poslovnih jedinica koje se nalaze u Federaciji Bosne i Hercegovine. Poslovnu mrežu privrednog subjekta HAAB a.d. B.Luka čini 6 filijala, te 26 poslovnica i poslovnih jedinica u okviru Republike Srpske.

Privredni subjekt Hypo Alpe-Adria-Leasing d.o.o. Sarajevo, Zmaja od Bosne bb, 71.000 Sarajevo (dalje HLBiH) osnovan je u septembru 2001. godine i upisan je u registar Općinskog suda u Sarajevu pod registarskim brojem 1-24584. Dio je Hypo Alpe-Adria Grupe i u (..)\*\*% vlasništvu privrednog subjekta Hypo Alpe-Adria-Leasing Holding AG. Privredni subjekt HLBiH je jedno od prvih leasing društava koje je osnovano na prostoru Bosne i Hercegovine.

Privredni subjekt Hypo Alpe-Adria-Leasing trenutno raspolaže sa ukupno 7 poslovnica u Mostaru, Tuzli, Banja Luci, Bijeljini, Bihaću, Vitezu i Sarajevu. Otvaranje novih podružnica u Livnu, Trebinju i Zenici planirano je u ovoj godini.

## **3. Analiza relevantnog tržišta**

U skladu sa članom 3. Zakona, odnosno čl. 4., 5. i 6. Odluke o utvrđivanju relevantnog tržišta prilikom analize relevantnog tržišta učesnika predmetne koncentracije Konkurencijsko vijeće je utvrdilo da je

relevantno tržište predmetne koncentracije tržište univerzalnog bankarstva, koje podrazumijeva pružanje usluga maloprodajnog i korporativnog bankarstva, kao i tržište lizinga na cijeloj teritoriji Bosne i Hercegovine.

Prema podacima iz Prijave u svom poslovanju, privredni subjekti HAAB d.d. Mostar i HAAB a.d. Banja Luka su se fokusirale na slijedeće segmente poslovanja, i to:

- usluge za stanovništvo, koje obuhvataju depozite, račune (tekući računi, tekući računi za studente i postdiplomce, žiro račune, devizne račune itd.), usluge novčanih transakcija, izdavanje kartica, krediti (razne vrste namjenskih i nenamjenskih kredita za fizička lica);

- usluge za preduzeća (korporativne klijente), koje obuhvataju širok spektar proizvoda, među kojima su najistaknutiji dugoročni krediti, kratkoročni krediti, dopušteno prekoračenje, bankovne garancije, oročeni depoziti, novčane transakcije, međunarodna plaćanja itd.

Ukupni tržišni udjeli privrednih subjekta Hypo Alpe Adria Bank d.d. Mostar i Hypo Alpe Adria Bank d.d. Banja Luka u ukupnoj bankarskoj aktivni Bosne i Hercegovine, na dan 31.12.2006. godine, iznosili su:

Tablica 2.

R.b.	Naziv banke	Bankarska aktiva na nivou BiH (%)
01.	Raiffeisen bank d.d. BiH	21,10
02.	Unicredit Zagrebačka banka d.d.	12,66
<b>03.</b>	<b>HAAB d.d. Mostar</b>	<b>11,56</b>
04.	HVB Central Profit Banka d.d.	8,71
<b>05.</b>	<b>HAAB a.d. Banja Luka</b>	<b>7,80</b>
06.	NLB Razvojna banka	4,07
07.	Nova banjalučka banka	2,65
08.	Ostale banke	31,45
	UKUPNO	100,00
	<b>UKUPNO HYPO GRUPA (03+05)</b>	<b>19,36</b>

Ukupni tržišni udjeli privrednih subjekta Hypo Alpe Adria Bank d.d. Mostar i Hypo Alpe Adria Bank d.d. Banja Luka, po segmentima poslovanja, na nivou Bosne i Hercegovine, na dan 31.12.2006. godine, iznosili su:

Tablica 3.

Naziv banke	Kreditni stanovništvu (%)	Kreditni pravnim licima (%)	Kreditni bankama (%)	Depoziti stanovništva (%)	Depoziti pravnih lica (%)	Depoziti Banaka (%)
HAAB d.d. Mostar	11,93	17,54	8,59	8,39	9,51	34,74
HAAB a.d. Banja Luka	8,81	11,62	0	4,76	2,84	33,73
<b>UKUPNO HYPO GRUPA</b>	<b>20,74</b>	<b>29,16</b>	<b>8,59</b>	<b>13,15</b>	<b>12,35</b>	<b>68,47</b>

Na osnovu podataka «Udruženja/Udruga Društava za Leasing u Bosni i Hercegovini» (UDL BiH), a dostavljenih od strane podnosioca Prijave Konkurencijskom vijeću, privredni subjekt Hypo Alpe-Adria-Leasing d.o.o. Sarajevo raspolaže sa 43% udjela na tržištu, zaključno sa danom 31.12.2006. godine. Pored finansijskog i operativnog leasinga, privredni subjekt HL BiH u svojoj ponudi ima i zajam. Kao objekt finansiranja se pojavljuju vozila, oprema i nekretnine, što su ujedno i tri osnovna segmenta u finansijskom poslovanju privrednog subjekta HL BiH. Grupe klijenata prema kojima je usmjereno poslovanje dijele se na privatni, pravi i javni sektor, kao i na kategoriju ostali.

Poslovanje privrednog subjekta HLBiH je usmjereno na mala i srednja preduzeća, korporacije kao i na fizička lica za koje postoji široka ponuda leasing proizvoda. Glavni konkurenti na tržištu Bosne i Hercegovine su privredni subjekti: Raiffeisen Leasing, VB Leasing, NLB Leasing, Euroleasing i HVB Leasing.

#### **4. Procjena koncentracije**

Konkurencijsko vijeće je, nakon procjene i analize podataka i utvrđenih činjenica u postupku donošenja predmetnog Rješenja ocijenilo da provođenje predmetne koncentracije neće narušiti postojeću tržišnu konkurenciju, s obzirom da privredni subjekat Bayern LB ne djeluje u Bosni i Hercegovini, te da će tržišni udjeli privrednog subjekta HBINT ostati nepromijenjeni i da navedena koncentracija neće proizvesti promjenu tržišnih pozicija na relevantnom tržištu.

Konkurencijsko vijeće je utvrdilo da se predmetnom koncentracijom privrednih subjekata ne stvara i ne jača dominantan položaj na relevantnom tržištu univerzalnog bankarstva i lizinga u Bosni i Hercegovini te je odlučilo kao u dispozitivu ovog Rješenja.

#### **5. Administrativna taksa**

Na ovo Rješenje podnosilac Prijave, u skladu s članom 2. tarifni broj 107. stav (1) tačka d) pod 1) Odluke o administrativnim taksama u vezi sa procesnim radnjama pred Konkurencijskim vijećem («Službeni glasnik BiH», broj 30/06), obavezan je platiti administrativnu taksu u iznosu od 2.500,00 KM u korist Budžeta institucija Bosne i Hercegovine.

#### **6. Pouka o pravnom lijeku**

Protiv ovog Rješenja nije dozvoljena žalba. Nezadovoljna strana može pokrenuti upravni spor pred Sudom Bosne i Hercegovine u roku od 30 dana od dana prijema ovog Rješenja odnosno od dana njegovog objavljivanja.

**Predsjednik**

**Sanja Božić**